

**Belanjawan 2013 Selangor Tiada Yang Istimewa, Kata Ketua Pembangkang Selangor
Bernama
19 November, 2012**

SHAH ALAM, 19 Nov (Bernama) -- Ketua Pembangkang Dewan Undangan Negeri (DUN) Selangor Datuk Mohamad Satim Diman menyifatkan Belanjawan 2013 Selangor yang dibentang pada Isnin tidak mempunyai sebarang keistimewaan yang boleh dibanggakan.

Beliau sebaliknya berkata pembentangan belanjawan itu adalah satu cubaan untuk mengalihkan perhatian rakyat daripada mempersoalkan janji Parti Keadilan Rakyat, PAS dan DAP yang tidak dapat dilaksanakan sejak pilihan raya umum lepas.

Ini kerana, katanya berdasarkan belanjawan negeri itu, kerajaan negeri hanya memberikan tumpuan kepada janji baru dengan melaksanakan projek mega seperti pembinaan jambatan ketiga di Klang, penggunaan Storm Water di hiliran sungai dan menaik taraf saliran dan membina rumah mampu milik pasang siap.

"Namun, apabila meneliti belanjawan negeri 2013, kerajaan negeri tidak menyalurkan kepada program pembangunan rakyat seperti penyelesaian kepada masalah petani dan usahawan... yang kita nampak projek mega sahaja.

"Sepatutnya, kerajaan negeri dalam belanjawan kali ini memberi tumpuan kepada usaha menyelesaikan janji-janji yang dibuat kepada rakyat pada pilihan raya umum 2008, bukan buat janji ataupun program baru," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=709855>